



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :



Tir Yimyim



tir_yimyim



tir yimyim

TAPAK 8

**Taoba Raijor Dal tanishir Gyanashree
Bora-i sorkar mapa toktsü**

**Asian C'ships: Rana-i 10m air
pistol asaya nung bronze angu**



VOL. XXIII ISSUE NO. 113 (ADOK 113) DIMAPUR YANGTEPNÜ (THURSDAY) TSÜKLAI (FEBRUARY) 05, 2026 ₹ 5.00

NPYF Nagaland-i VK Town & Doyang Bridge tsüingda lenmang ashishir

Dimapur, February 4, 2026

(TYO): National People's Youth Front (NPYF) Nagaland State Unit-i VK Town aser Doyang Bridge tsüingda lenmang yangluba nung tim masüba aika ajitetba metetdaksüogo.

NPYF Nagaland State Unit züngsem kar Mokokchung-i aodang iba lenmang nung retaining walls yangluba angudang kanga aoksatep aser mepelar ta Media Cell sangdong ka nung ashi.

Iba lenmang nung "plum concrete walls" ji dry stone stacking ama repranger aser anentsüh aluba tesem ka nung yanglutsüla ama masü ta NPYF-i ashi.

VK Town-Doyang lenmang nung nüngdakba concrete matrix mali aser iba jagi tashi maitsüsü.

ama repranger ta parnokisa ashi.

Iba ama mapa tamajung inyakba ajanga lendong ataloktsü akok aser tang yanglua aliba retaining walls ajanga tzünglu metizüktsü. Retaining walls chirepba, anentsüh aluba ajanga iba tesem nung connectivity mali akümtsü, ta NPYF-isa metetdaksüogo.

Parnokisa Public Works department (National Highways) dang tangsa mapa inyakba reprangdangtsü aser iba mapa inyakba contractor maitsü puteta yimjak nung metetdaksütsü ayongzükogo.

NPYF-i tang yanglua aliba mapa retaining walls tamajungtem agientsü aser engineering codes nung lateta aliba ama yanglutsü tetuyuba agütsüsü ayongzükogo.

CM Mamata-i Supreme Court nung noktak

New Delhi, February 4, 2026

(Agencies): West Bengal Chief Minister Mamata Banerjee-i chief minister teinyakdak kati meinyakdangba mapa ka inyakago aser ibaji Supreme Court nung noktakba lir.

Bodbarnü Mamata-i West Bengal nung Special Intensive Revision (SIR) inyakba anema benokba ken o atema noktak.

Taruba Assembly elections nung rangloker electoral rolls indang SIR inyakba ta lai ashi.

Iba SIR ajanga nisung 150 tema süogo aser tasürtem rongnung Booth Level Officer ka densema liasü. Chief Electoral Officer nungi tetuyuba onsara agütsüba mekokteti pa asü ta Mamata-i ashi.

Trinamool Congress tanishir Mamata ya anogo asem tejakdang New Delhi-i arua liasü. Bodbarnü lai Chief Justice of India Surya Kant aser Justice Joymalya Bagchi o Justice Vipul Pancholi nunger Bench tsüingdang Election Commission of India (ECI) anema jembi.

Iba SC Bench ajanga West Bengal nung SIR maparen inyakba anema benokba petition balala angadanger.

"Kechiba Bengal? Assam mesüra tanga northeastern state tem koda? Election Commission-i nübortem tenüng agientsü atema Bengal dak tenük yoker. Anungji okadaki sensopur democratic rights kümüzüka ayutsü atema tebang aitsüla" ta Chief Minister Mamata-i SC nung ashi.

"SIR indang mezüingbuba shilem nung tenüng lakh 58 shi agienogo aser parnok aika Form 6 kübok temepishiba magütsüdaktsü" ta lai ashi.

"Tenüng agienba ya BJP-i

yimsü asüba state tem nungi aruba micro-observers ajanga inyak aser local electoral staff mamshi. Sensotemi domicile certificates aser tanga government-issued proofs agütsüba magizük" ta Mamata-isa shisem.

"SIR ya tenüng agientsü atema dang inyakba ama repranger. Tetsür kati kibong akümba sülen la kinungbo tenüng amshiba mesüra lar kinnungbo'er kidangi aobaji 'mismatches' ama züngshir. Ano nisungtem mapa atema tesem belenbaji "logical discrepancies" kübok züngok aser electoral roll nung agientsüsa kümogo" ta Mamata-isa metetdaksü.

"Küm 24 sülen kechiba ita pezü nung tembangtsü ariteper. Aluruba aser Puja mongpu nung nisungtem pei ki toktsür orr alidang notices agütsü" ta laisa ashi.

Laisa taküm March/April election atema voter lists ji 2026 SIR nung masü saka 2005 data nung ajemdaker agitsü Supreme Court dang ashi.

Bharatiya Janata Party-i tuyuba nung ajemdaker election ketdangsürtemi BJP nem vote meinoktsür voters lakh aika agienogo ta Mamata-isa shisem.

"Election Commission-i telangzüba magütsüba atema mepelar. Ajak tembangba sülen lawyer temi tokteper. Ni ECI dangi shidi trok züluogo saka telangzüba ka dang mali" ta Mamata-isa shisem.

"Ni tongtipang nisung ka masü, aayanger ka saka ni ozü party atema rararba masü. Ni temeten bushiba ordinary nisung ka dang lir" ta laisa Supreme Court dang ashi.

Manipur nung President's Rule agiener sorkar kümogo



Manipur Governor Ajay Kumar Bhalla (abelen) aser Chief Minister Yumnam Khemchand Singh na noksa nung angur.

Imphal, February 4, 2026

(Agencies): Bodbarnü Yumnam Khemchand Singh-i Manipur chief minister inyaktsü tezüngzüktep agiogo. Yashi pa Bharatiya Janata Party (BJP) legislature party leader shimteta sülen anogo ka lir tanü chief minister kümogo.

Kasa mapang BJP MLA aser Kuki tsür Nemcha Kipgen aser NPF MLA aser Naga nunger Losii Dikho nati deputy chief minister inyaktsü tezüngzüktep agiogo.

Nemcha Kipgen ya Manipur nung mezüingbuba tetsür deputy chief minister dang masü saka Kuki-Zo nunger rongnungia mezüingbuba deputy chief

minister lir.

Iba sentong agitsü ghonda ishika lia Manipur nungi President's Rule agiena liasü.

Union home ministry-i sangdong ka ajanga yaküm February nungi benokba President's Rule agienba metetdaksü.

Losii Dikho ya Mao assembly constituency nungi MLA aser Nemcha Kipgen ya Kangpokpi assembly constituency nungi MLA lir.

Maneni, BJP MLA K Govindas-i Home Minister aser National People's Party (NPP) MLA Kh Loken-i Cabinet Minister inyaktsü tezüngzüktep agiogo.

Cabinet-i FNT, Oil Exploration, Land Reforms indang lemtet balala agiogo

Kohima, February 4, 2026

(TYO): Nagaland Cabinet-i Frontier Nagaland Territory, oil and natural gas exploration, aser landholding reforms atema lemtet kar agiogo.

"February 3, 2026 nü Chumoukedima nung Cabinet senden amendang onük aika benoka lemsatep. Onoki talisa ENPO-i Frontier Nagaland Territory (FNT) tentettsü ahangba atema temulung agüja jembiogo" ta Government Spokesperson & Minister, K G Kenye-i ashi.

"ENPO aser India sorkar tsüingda New Delhi nung olemtep alitsü aser state sorkari Brihostibarnü iba indang osang tajung angashitsü imlar" ta Kenye-i ashi.

"Mapang talangka mebanteti aruba tebilemstsü ya asen nübortemi mulungba aser aginüba ama angatetteptsü imlar" ta pai ashi.

Cabinet-isa Political Affairs Committee (PAC) kübok sub-committee ka tentettsü telemtetba agi. Iba sub-committee nung Chief Minister convenor asütsü aser Deputy Chief Minister ana, Member of Parliament ana aser Cabinet minister kar züngsem asütsü.

"PAC ya telok tulu ka lir aser

senden shia züngsem ajaki shilem agiteter. Anungji sub-committee-i maparen inyaktsü aser nüngdakba mapang PAC tsüingdang tebilembatem benoka lemsateptsü" ta Minister Kenye-isa metetdaksü.

Iba sub-committee nungi teshimtet telok ka New Delhi-i apusoa ogo aser parnok Free Movement Regime (FMR) aser Protected Area Permit (PAP) benokba atema jembitsü.

Parnoki Centre dang PAP meyipa reprangshitsü atema ayongzüktsü. Iba ajanga Nagaland nung tetsükdaksü tulu agütsür ta Minister Kenye-i ashi.

"State Cabinet-isa Nagaland nung oil and natural gas exploration onük benoka lemsatep. Iba tebilemstsü ta okadaki aoba sülen ashishiteptsüsa aküm aser okadaki iba onük angadangtsü mulung agizük saka tang tashi tatembang oshidang ano magütsü lir" ta pai metetdaksü.

Constitution nung Arla 371A kübok Nagaland nem temeten balala agütsüba nung ajemdaker oil and gas exploration maparen inyaktsü Cabinet-i lemtetogo ta paisa ashi.

"Arla 371A ajanga ali aser idakji aliba rongsen ajunga Nagaland nung alir meyong ta ashir. Linük

Lok Bhavan, Imphal nung agiba sentong nung opposition MLA tem, taoba chief minister tem N Biren Singh, O Ibobi Singh aser R K Radhabinod nunger den police aser sorkar ketdangsür tongtitem aden.

NPF-i tenüingsang agütsür

Dimapur, February 4, 2026

(TYO): Manipur nung Chief Minister tasen Yumnam Khemchand Singh den Deputy Chief Minister ana- NPF MLA Losii Dikho aser Nemcha Kipgen nunger nem tenüingsang tulu agütsür ta Naga People's Front (NPF)-i metetdaksüogo.

"Manipur nung küm ka jungnüa President's Rule aliba anener state sorkar tasen akümba atema tenüingsang agütsür. Sorkar tasen ajanga yimjung aser tensa süngjemtsü asoshi mapa inyaktsü amanger" ta Press Bureau, NPF-i sangdong ka nung ashi.

"Manipur nung sorkar tasen ajanga putepshiba maparen den ajak densema aser nübor dak rangloker terenlok mapa inyaktsü imlar" ta parnokisa ashi.

Manipur nung nübortem yimjung, terenlok aser azükaru asoshi BJP-i aniba sorkar pusema nungittsü nangzükshir ta NPF-isa metetdaksüogo.

nung tanga state kecha nem-a iba amai latetja mali. Nagaland nung tema aser telung nung aliba ali rongsen ajunga ali kiburtem aser nübortem meyong aser state sorkari parnok mulungba ama aser temelaba agir ang inyaksangshir" ta Minister Kenye-i ashi.

"Linük kübok tangalen petroleum & natural gas ya central subjects ama züngshir saka Nagaland nungbo iba amaji masü. Asenok sasep nung mangatettep adokba ajanga iba tebilemstsü okadak benoktsüsa akümba atema sasar. Iba ajanga maparen menur ajisüaka bangdak teloki ken o meyipa agiba ajanga okadak onükji nüngdak mali ama kümogo" ta paisa metetdaksü.

Cabinet-isa landholding system ketdangsüba dak sendakba nung tebilembatem meyipa reprangshia liasü.

Cabinet-isa Inner Line Permit, Bengal Eastern Frontier Regulation aser Register of Indigenous Inhabitants of Nagaland atema tetuyuba tasentem agütsüsü lemtetogo. Tesüiba nung non-cadastral aser government-occupied lands nem individual pattas magütsü liasü saka tangbo nija ali kiburtem ama registration, land pattas yanglutsü aser land revenue menoktsü.

Advisor Yhome-i Kohima jana indokdak tesem semdang



Advisor, School Education & SCERT, Dr. Kekhrielhoulie Yhome aser ketdangsürtemi Dzürüzou, Meriema, Kohima nung KMC dumping site semdangba mapang tangokba noksa nung angur.

Dimapur, Tsüklai/February 04 (TYO): Advisor, School Education and State Council of Educational Research & Training (SCERT), Dr. Kekhrielhoulie Yhome, shibai SBM (U)-2.0, Dumpsite Remediation Acceleration Programme (DRAP) for legacy waste remediation kübok Dzürüzou, Meriema, Kohima nung KMC dumping site yangluba ketdangsütsü mapang agizüka ali, pai February 3, 2026 nü Mission Director, SBM (Urban) Kexhochole Rhetso aser

Kohima Municipal Council (KMC) nungi ketdangsürtem den külemi iba tesem semdanga liasü.

Kohima ya jana indokba tesem maliba yimti ka kumdaksütsü asoshi iba sentong kübok maparen balala inyakba indang Mission Director, SBM 2.0 aser KMC ketdangsür temi lemsatapa liasü aser mapa ya Ministry ajanga lateta yutsüba mapang renemtsü ta ashi.

Dr. Kekhrielhoulie Yhome-i ketdangsürtem dang mapa tekeraba nung renemtsü

ajungshi aser remediation process ya latetja aliba mapang renemtsü shia liasü.

Paisa nüburtem dang yimya tajung nung jana ketdang asütsü, talisa kidang jana bendangtsü ayongzüka liasü.

Jana tajungba nung bendena scientific yimya nung indoktsü asoshi shisa aoba, shisa maoba aser timtem aketba jana bendangtsü tongtipang ta pai ashi aser mürekmejua alitsü asoshi nüburtemi shilem agia yimya tajung sübatsü tongtipang lir, ta Advisor Yhome-isa shia liasü.

Kohima district Dobashis atema orientation sentong agi



DC Kohima, B. Henok Buchem aser ketdangsürtem DBs tem den DC Kohima indang Conference Hall nung orientation sentong alidang tangokba noksa.

Dimapur, Tsüklai/February 04 (TYO): Kohima district nung aliba Dobashis (DBs) atema anogo ka orientation sentong February 3, 2026 nü Deputy Commissioner, Kohima indang Conference Hall nung ayongzüka liasü. Administration, customary justice aser sorkar inyakyim nung parnok teinyaktsü tajungba nung angatetdaksütsü atema iba sentong ya ayongzüka.

Sentong tenzüka Deputy Commissioner, Kohima, B. Henok Buchem, NCS-i jembidang akhi mapang nungi Naga nung loktiliba nung Dobashi temi tongtipang shilem agia aruba lemsatapa liasü.

1918 nung Naga Club tentetba athishia, akhidang Naga political movement nung Dobashi temi tongtipang shilem agia liasü aser Simon Commission nem agütsüba memorandum nung meyonngem agütsür rongnung parnok nisung toku Dobashi liasü ta ashi.

Dobashi tem ya ajaki akumtsüboba institution ka lir, konbg executive aser judicial tashi agüja lir, aser mapang melenshia aser lokti melenshia aruba ama Dobashi temia ozüng matsüngdang ajak sako ta angatetsüla, ta DC Kohima-i

ashi.

Pai Dobashi tem dang tetsübo makai indang-indanga obendang agütsütsü, yimtsüng aser kin balala politics nung indang-indanga alitsü, yimya tajung amshitsü aser yimjung yanglur aser administration indang representatives mapa nendaka inyaktsü ajungshi.

Dobashis tem tenüng nung Noth, DB-I ajanga jembidang district administration aser ketdangsür temi iba sentong ayongzüka asoshi pelaba lemsatapa aser loktiliba aser administrative melenshiba ajanga Dobashi tem transition period ka nung lir ta ashi aser iba sentong ajanga parnok len anitsü imlaba lemsatapa.

James Renbi Kikon, SDO (C) Sadar-i Dobashi institution tenzüka indang rateta ashi. Dobashi tem ya oshi ana jembiba nisung ama liasü aser parnoki colonial administration aser Naga nung tsünga oshi meyiptsü aser sobaliba nung tetsüngtai aier ka ama liasü, ta ashi.

Ketoulhoutuo U. Rame, Senior Legal Assistant, DC Office Kohima ajanga Village Council Act, 1978 aser Bengal Frontier Regulation Act, 1873 indang nung jembia liasü.

Village Council Act yagi

putu menden nem tashi agütsür aser yimtsüng inyakyim ketdang asütsü, aser customary yimya nung ajemdaker mangatettep bentettsü tashi agütsür, ta lai ashi.

Laisa Bengal Frontier Regulation Act ajanga Naga nung sobaliba ozüng aser traditional institution wazüka ayur ta ashi.

Sentong nung Imtiyenla K., EAC Kohima-i district administration nung Dobashi tem teinyaktsü indang lemsatapa liasü. Dobashi tem ya British nung mapang 1842 nung administrators aser Naga kin tsünga oshi meyiptsü ama tenzüka aser meilongi traditional aser administrative inyakyim meyoktepa aben tenzüka ta ashi.

Dobashi tem ya sorkari shimer, anogoshi inyakyim nung administrative officers yarir, yimtsüng sasep nung osangtsüsang agiteper, mangatettep adokba nung tetsüngtai ia angatetteper, inspections, surveys, law and order mapa inyaker aser police aser magistrates yarir, ta lai ashi.

Dr. Riku, EAC (Sadar) ajanga Rules for the Administration of Justice and Police in Nagaland onük nung jembia liasü.

Akashvani Kohima nung PTCs atema nübu bushir



Dimapur, Tsüklai/February 04 (TYO): Chümoukedima, Longleng, Meluri, Mon, Noklak, Peren, Phek, Shamator, Tuensang, Tseminyu aser Zunheboto district tem nung Part Time Correspondents (PTCs) inyaktsü atema Akashvani Kohima ajanga application meshir.

Qualification ya PG Diploma/Degree in Journalism/ Mass Media mesüra Graduate sür küm ana tashi osang abenba mapa inyaka alir asütsüla, arishi küm 24-45 tsünga asütsüla.

Application agütsür ya pei district nung district headquarters nung mesüra District Headquarters/ Municipal limit nungi kilometer 10 telungzüka nung alir asütsüla, North-Eastern states ama arütsülen osangbener inyakdang alirtem ajungtsü, ta sangdong ajanga ashi.

Computers aser word processing metetba nübu asütsüla aser electronic coverage inyakdang asütsüla.

Nübu shimba nung interview alitsü. Qualifications,

professional experience, district & state, current affaris, welfare schemes indang awareness, Radio news, osang abenba yimya, zülutsü junga meteta alir, communication technologies meteta aliba nung ajemdaker shimtsü.

Part-Time Correspondent (PTC) ya contractual retainership basis yimya nung shimtsü aser mezüngbo pa/la mapa inyakba ita asem asadangtsü, Mezüng ita asem tsünga contract ya ita shia renew asütsü aser iba mapang pa/la mapa nung temulungsüra, arishi küm 60 majung tashi küm shia contract ya renew asütsü.

Sorkar mapa, Central/State Govt. mesüra Public Service Undertaking (PSU) nung inyaker aser political party züngsem magitsü.

Bio-data den kulizüng kaket tem pei sasa meyonngem agütsür noksa ka dener Head of Office, Akashvani, Old Minister's Hill, Post Box-42, Kohima, Nagaland, PIN.797001 nem February 20, 2026 tashinung tongtsütsüla.

GHS Tuensang Village semzüko



uensang Village nung Government High School semzüksüba sentong nung tangokba noksa ka nung MLA, Imtichoba Chang aser ketdangsürtem angur.

Dimapur, Tsüklai/February 04 (TYO): MLA Imtichoba Chang-i February 4, 2026 nü Government High School, Tuensang Village semzüka liasü.

Pai iba sentong nung jembidang, Nagaland Chief Minister., Neiphiu Rio; Advisor, School Education; Commissioner & Secretary, School Education; District Administration, Tuensang; DEO Tuensang; SMC aser Tuensang Village Council ajanga Middle School nungi High School-i upgrade asüba nung shilem agiba aser yaritepba asoshi pelaba lemsatapa liasü.

Iba school lapoker küm 57 lir nüburtemi school upgrade asütsü mepishiba nung sorkari telangzüba agütsüogo ta pai ashi.

Pai Village Council dang iba school nung kibur akumtsü aser danga yimtsüngtem nungi aruba kaketshir aser tesayur indang Guardian ama alitsü ayongzüka liasü.

Pai tesayurtem dang kaketshir asoshi teimla tesangwa asütsü ajungshi aser School nem konang bener arutsütsüsa kaketshirtem dang sayua len anitsü aser district nung danga Government School den tokteptsüsa kaketshir anitettsü ajungshia liasü.

Iba sentong nung Noksensangla, APY TSBL ajanga sarasadem, Mongko Chollan, Chairman SMC ajanga pela agizükba o jembia liasü.

Shelly Katiry, ADC Tuensang; C. Pongsu, CWS tir; Rose Ngullie, DEO Tuensang aser B. Kaimang, TVCU tir temia iba sentong nung o tatsütsü jembia liasü.

Rev. T. Mongba, Pastor, TSBL ajanga Tsüngrem o jemi aser school ki meshiteta sarasadem aser Yakchingsonla, Teacher Incharge, GHS Tuensang Village ajanga melepzüng o jembia liasü.

Iba sentong nung Noksen, GT GHS, Tuensang Village menden liasü.



New Delhi, February 04, 2026: India-US shishilembaba tezüngzüktep anema AAP MP tem-Sanjay Singh, Malwinder Singh Kang, Raj Kumar Chabbewal aser party lenirtemi Parliament kima longkak aitba noksa nung angur.

Temang mejungi aliba nung ajemdaker Wangchuk chioktsüla: SC

New Delhi, Tsüklai/February 04 (Agencies): Bodhbarnü Supreme Court-i Centre sorkar dang, takoktsü dang süra climate activist Sonam Wangchuk temang mejungi aliba nung ajemdaker pa chioktsüla, ta metetdaksü.

Justices- Aravind Kumar aser P. B. Varale nati akümba bench-i, Wangchuk health report ji majung, ta shia Centre atema ken o jembitsür additional solicitor general K. M. Nataraj dang iba dak sendakba nung ajemdaker inyaksangshitsü tuyu.

Bench-i, "Pa aputsü atema yaküm September 26 nü tetuyuba agütsüba sülen ita pongu ajunger. Pua alisang

temang mejungi alibaji shisadangtsüla. Onoki reprangdangba report apibo pa temang majung. Tain akümba dak sendakba timtem kar lir. Sorkari ibaji shisadangtsü akok asü," ta metetdaksü.

Ajioda sorkar tenüng nung ken o jembitsür, Nataraj-i court dang pa ibaji tim ketdangsertem nem metetdaksütsü, ta ashi.

Ken o angadanga mapang nung additional solicitor general-i, yaküm Leh nung rara adokdaksüba Wangchuk ajanga lir, ta metetdakja liasü.

Yaküm Leh nung longkak aitba mapang nung nisung pezü asü aser 161 yirua liasü.

Nataraj-i, "Pai jembiba o

aser ajungmesoba ajanga rara adok. Pai shilem agia meliaka pai telok ka ajungmesoa liasü. Pa aitsütsü atema iba jagi teperi," ta metetdakja liasü.

Iba ken o ya Brihostibarnüa angadangtsü.

Mongolbarnüa Centre aser Union Territory of Ladakh administration-i Supreme Court dang, arrtsülen aliba tesem nung tensa raksadaksütsü atema nüburtem ajungshiba asoshi Wangchuk apu, ta metetdakja liasü.

Hombarnüa Centre-i, Nepal aser Bangladesh na nung atalokba ama atalokdaksütsü atema Wangchuk-i Gen Z lanurtem ajungshi, ta metetdakja liasü.

Yaküm Maoists telungpur 364 tepset aser 2,337-i surrender asü

New Delhi, Tsüklai/February 04 (Agencies): Yaküm security sepaitemi linük tesem balala nung Maoists telungpur 364 tepset, Maoists 1,022 apu aser 2,337-ibo sepaitem matsüngdang surrender süogo, ta Mongolbarnü Union home ministry-i Lok Sabha senden nung metetdaksü.

Linük nung Left-wing extremism (LWE) dak sendakba nung tasüngdangba balala langzüdang junior home minister Nityanand Rai-i, 2019 küm Maoists dak sendakba rara tatalokba district 61 nung liasü, ajisüaka yakümbo district 32 nung dang liasü, ta metetdaksü.

Paisa, 2019 küm item ama tatalokba ya police stations 245 kübok ataloka liasü saka

yakümbo police station 119 kübok atalok, ta ashi.

2010 küm Maoists dak sendakba rara 1,936 liasü saka 2025 küm nungbo tatalokba 234 dang liasü, aser ibaji shilem 88 agi tajemba akümba lir, ta paisa metetdaksü.

Tesüiba küm ka tsüngda Maoists nung tongti ketdangser 10 dak tali tepsetogo aser parnok rongnung No. 1 Nambala Keshava Rao (Basavaraju) densema liasü. Basavaraju ya politburo (PB) aser central committee (CC) züngsem ka liasü. 2025 küm nungi 2026 küm tetenzüklen tashi nung Basavaraju densema Central Committee züngsem 12 tepsetogo.

2019 küm nungi tenzüka peisasa surrender asür

Maoists telungpurtem nem senotsü aika agütsür, aser ibaji ajanga tangbo aikati surrender asür.

2019 küm nungi tenzüka tang tashi nung Maoists 5,880-i surrender süogo aser iba nungji 2025 küm kija nung surrender asür 2,337 densema lir.

2019 küm nungi tenzüka tang tashi nung Maoists 7,409 puogo aser iba nungji taküm January 1 nungi January 15 tsüngda kija nung Maoists 18 apuba densema lir.

2018 küm Maoists-i timtem agütsüba district 126 liasü saka tangbo Maoists-i timtem agütsüba district 8 dang kümogo.

Centre sorkari taküm March 31 tashi nungbo Maoists meshimeshia samatsütsü nükjidong yur inyaker.



New Delhi, February 04, 2026: Congress MP Priyanka Gandhi Vadra densema budget senden piyong anentsüba Lok Sabha MP temi Parliament kima longkak aitba noksa nung angur.

2024-25 küm Bihar nung lendong balala nung nisung 2,547 asü

New Delhi, February 04 (Agencies): 2024-25 kümsük nung Bihar nung tziü-mopung dak sendakba lendong balala nung nisung 2,547 asü, aser ibaji 2023-24 kümsük den medemdangra nisung teimba (400 dak tali) asüba lir, ta assembly nung benokba state Economic Survey nung metetdakja lir.

2024-25 nung Bihar nung tsüingi lendong nung nisung 305 asü aser nisung 29 yirua liasü, mi lendong nung nisung 143 asü aser tatsük agi nisung 34 asü.

Geographical area aser tsüngsang mopung kulitem ajanga Bihar nung lendong kanga bulua ataloker; district teimbaka nung tziümeetsü, menoknok aser yipru lendong kanga bulua ataloker, iba denji külemi tsüngsarusa aser mi lendong ataloker, ta survey nung shia lir.

Talisa tziümeetsü lendong agi state kübok south-central aser south-eastern nung aliba tesemtem kanga kongshir.

Yaküm April ita kija nunga tsüingi lendong nung nisung 90 dak tali asü aser tziüglu ajanga kiojen den alu raksaja liasü.

Osangbener den jembidang Disaster Management Department Secretary, Chandrashekhar Singh-i, "Bihar nung tziümeetsü, tsüngsarusa, tsüingi aser yipru lendong kanga bulua atalokba nung ajemdaker state sorkari lendong nokdangtsü atema nendaka inyaker aser takoksa anguba kibongtem nem teyari agütsür," ta metetdaksü.

Paisa, Bihar State Disaster Management Authority (BSDMA)-i nüburtem nem lendong balala indang rajemdaksütsü atema state tesem ajaklen awareness campaign agitsü, ta ashi.

"Lendong atema renema alitsü asoshi kaketshirtem nem angazükdaksütsü nükjidong nung onoki iba awareness campaign ya school tem nunga agitsü," ta paisa shisem.



February 04, 2026 nü Washington nung India External Affairs Minister, S. Jaishankar aser Cyprus Foreign Affairs Minister, Constantinos Kombos na senden amenba sülen tangokba noksa nung angur.

Jaishankar aser Rubio nati India-US tezüngzüktep pelaa agizüker

New Delhi, Tsüklai/February 04 (Agencies): Bodhbarnü Washington nung India External Affairs Minister, S Jaishankar-i US Secretary of State, Marco Rubio ajurua senden amen aser iba mapang nungji tenati US aser India na tsüngda shishilembaba dak sendakba tezüngzüktep agiba pelaa agizük.

Jaishankar aser Rubio nati kanga tongtibang minerals dak sendakba nung amalitepa inyaksü atema o lemtepa liasü.

Senden tembangba sülen Jaishankar-i X ajanga, "Tanü nikongdang US @SecRubio den senden amen. Künati linük ana tsüngda amalitepa inyakba onüktem, regional onüktem aser international onüktem nung o lemtepogo," ta metetdaksü.

"India-US Strategic Partnership kübok shishilembaba, energy, nuclear, defence, tongtibang minerals aser technology atema jembiogo. Linük anaprongla külem onüktem inyaksü atema tekeraba nung senden mena jembitsü bangjemogo," ta pai

metetdaksü.

State Department Principal Deputy otongdar, Tommy Pigott-ia, "Tir Trump aser Ato kilonser Modi nati linük ana tsüngda shishilembaba tezüngzüktep agibaji Rubio aser Jaishankar nati pelaa agizükogo. Lenir anatisa rongsenkettzüng tsütsü maongka tasen angutsü aser energy tsütsü nükjidong ataloktsü atema democracy linük ana tsüngda longjemer inyaksüji kanga tongtibang ta bangjemogo," ta metetdaksü.

February 2-4 anogotem nung US semdangba mapang Jaishankar-i Critical Minerals Ministerial senden nung shilem agiba den külemi US nung tongti ketdangsertema aika ajuruogo, ta Ministry of External Affairs-i metetdaksü.

Ministerial senden nungji US tatong Tir J D Vance, Rubio, Special Assistant to President of United States & Senior Director for Global Supply Chains David Copley aser Under Secretary of State for Economic Affairs, Jacob Helberg nati okila jembia liasü.



TIR YIMYIM YIMOBILEM (EDITORIAL)

DIMAPUR THURSDAY, FEBRUARY (TSÜKLAI) 05, 2026

Yi agi yimten o arogo na ajurutepdaktsü

Tan February ita tenzükba mezüing anogo amungnü Nagaland Baptist Church Council (NBCC) lenirtemi oagi Nagaland nung yimsüsürtem den külemi parnok State Chapel Hall, Kohima nung tekülem sentong agiba den külemi, ano, Nagaland nung yi meyanglutsü aser mayoktsü özüng lateta aliba indang tebilemtsü ken o süoka shisalemsatepba sentongji mapang shitak ka nung mapa shitak inyakogo. Atangji, Nagaland nung yi meyanglutsü aser mayoktsü özüng lateta aliba ya Naga nung asoshi temulung anisüngzükdak asütsüba mapa ka ser nung tebilemtsü mapa-ang ka akümba ya, Naga nungertemi yi mayok aser majem maremba ajanga adoker. Iba jagi, talisa, Dimapur nung alirtemibo tetsürtemia dena yi yokdaktsüner. Iba ama mapang ka nung arogo lenirtemi yimten yimsüsürtem bushia oa ajurua sensaksemba jagi tamakok mapa agi takok küma inyaktsü imlar. Atangji, tang tashi nungbo Nagaland nung yi meyanglutsü aser mayoktsü özüng latetba ya tenüng agidang lateta toktsür, özüngji mapa küma inyaker mali amai toktsüba angur, kechiyong yi meyanglutsü aser mayoktsü özüng alema yi ayokertem ya yi miima ayokertem masü saka odia ayokertem lir. Aji oda, talisa Dimapur nung yi ayokdak mapang tatsüka repranga atara, yi alirtemji sepai uniform nung dena arua alia bener aoba angutsü. Iba jagi yi mayoktsü özüng yanglurtem aser yi ayokba nokdangtsü nungloktsüba deparment nung inyakertertem mapa sayur. Anungji, Nagaland nung yabo yi meyanglutsü aser mayoktsü özüng latetba ya tamakok ta jembitsüla masü, kechiyong iba özüng ya mapa küma inyaktsü asoshi tapusoa mapusodang, odang özüng lateta toktsür pasasa mapa küma oang ta ser toktsü amai ka dang inyakba reprangteter. Aji oda, takok aser tamakok yabo mapa küma inyakdangba nungia adoktsü saka asenoki yi meyanglutsü aser mayoktsü özüng latetba yabo mapa küma tenzükba moudang amai dang angur. Atangji, ibaji angatettsü melamelar, kechiyong Nagaland nung yi mayoktsü özüng latetba ya state government nung alir yimsüsürtemi apitetba, reprangtetba aser mulungtetba mapa ka masü saka arogo nungertemi arong marem kanga memelungika latetba özüng lir. Ibayongji, özüngbo latet saka mapa küma inyaktsü tangatetba aser temulungtetba yimsüsür aser ketdangsertem mulungjang nung malia ta angateter. Aji oda, pei memulungba mapa ka teloki kangshia nungloktsüba agi tagizükbo agizük saka kena mapa küma inyaka aotsü memerangdang telok südaktsü ama, yi mayoktsü özüngbo azüng saka özüngji mapa küma inyaka aotsüsa government-i sentong kecha meyanglu ser odang toktsüba agi, tanü Nagaland tesem ajak nung yi angur. Atangji, iba tebilemtsü nung jagi arogo ajentsü makok, kechiyong ibai arogo nungeri yimten nem kangshia latetdaktsüba mapa ka lir. Iba tangatetba nung, arogoi Nagaland nung yi meyanglutsü aser mayoktsü asoshi sashisashia nokdakba ama, yi meyanglutsü aser mayoktsü özüng mapa küma inyaktsü asoshi maneni meranga inyaktsüla. Aji oda, tang Kohima nung arogo lenirtemi yimsüsürtem ajurua sarasadem mapang agia jembiba ama, ano maneni Nagaland nung yi ayokba tesem ajak nung arogotemi ita nung khenbo sarasadem mapang agia jajatsüba Nagaland nung yi meyanglutsü aser mayoktsü özüng mapa küma inyaka aotsüba sentong tongtibang ka asütsüla. Ibai yimten mapa nung tashiyim agi masü saka tangatetba agi inyakba "Non-violence Movement" amai ka asütsü. Aji oda, tamakok nung tenüng agir shinga mali, kati ka aitsütepba ama mesüi, özüng mapa küma inyaktsüba khuretjia arogoi pei khuret amai bilema, tang NBCC lenirtemi özüng yanglurtem bushia tsüngdong oa sarasadem mapang agiba ama, pei pei district aser pei pei town nung arogo aser mungdang nung lenirtemi yi ayokba mittsü shimtetba mitkartem aser yi ayokertem bushia oagi sarasadem mapang agi tenzüktsüla. Iba jagi dang Nagaland nung yi tongpang ya akoktsü. Atangji, yi mayoktsüla ta akangtsübo temela saka yi meyokdaktsüi nokdangtsübo tasak ta arogoia angatettsüla. Ibajibo yi ki tonga oagi sarasadem mapang agipet agba agidang akoktsü.

OLEMSABANG

TSÜRABURICHIRNURNEMMAPANG PERIAAGÜTSÜTSÜLA

~ L. Kika Pongener.

(Yashi adok nungi...)

Ano kanga tesasatsüka, tsürabur aikati chirnur dang mapa inyaktsü mesayur. Talisa, aiur chanu aika nubu junga tain kümer sernung sorochoiktsü mashi, sungo yanglutsü mashi, suoshi shitoktsü mashi aser ki mapa inyaktsü mashiba aika lir. Ibaji tetsü kati pei teinyaktsü mapa shidak meinyakba aser mesayuba tamakok tulutiba ka asütsü. Tetsür taküm kaji kechi komar'ka Degree tulu züngaka, office nung tulur menden nung men-aka kibong nungbo kinungtsüsa asütsü. Anungji kidang teinyaktsü mapaji-bo laisa inyaktsü. Tetsü kati pei jala dang sorochoiktsü, sungo yanglutsü, suoshi shitoktsü itum mapaji mesayura, la kiba-kiyi orr tebur den alidang kanga tim-atemtsü; aser idangji tsürabur tetla-tetshitsü. Tetsür kati pei teinyaktsü mapa mashibaji konang-nungsang ka masü saka maaksua lir. Kechi komala kibong ka sudir suang, takar-tulur 'Royal Family' kibong amala nungia suang, sensaker kibong ka nungia suang, saka tetsür kati tetsür mapa metettsüla. Tanü putu nung kibong aika nung kinungtsür aikati kidang kilir lir ta sur, choka nung sorochoiktsü mapa ajunga kilir nem dang shiloka toktsüba agi kibong aika rongsenketzüng nung sensak tiaï ayir; kechiyong kilir jagi kecha tapayu meli-i lalushiponga dang; oda kodaser nangnanga molamoshia jangradema chiyungtsü ibaji asa-a dang sorochoiktsü; aser idangji kibongji memeteti tanem-tanemi sensak tiaï ayitsü. Anungji kidang kilir aliyongjia kilung nung sorochoik mapa ajak nung tetsü kati teka amouka inyaktsüla. Ano tebu kati pei jabaso dang tebur mapa inyaktsü sayutsüla. Asangur nubujung kati sung asohtsü/lepsatsü; ki asütsü/ yanglutsü; yongrak araktsü iba amala mesukba mapa memetetra....Ibaji maaksu tulu ta angatettsüla.

Ano kangasa tongtipang kaji....Chirnur bendang lima talang nung oa azüngertem koma züngdar (?) College aser Institution-i shidak aor asü maor (?) Item ajakji tsüraburtemi bushitsüngdanga metettsü kanga tongtipang lir. Tanü putu nung India lima City aika nung 'Taila University/Colleges' (Fake) aika lir. Anungji itemji kanga junga meteter dang züngdaktsütsüla. Ano kaketshir aiur-asangur karbo apuani amai, ki ka nung külemi alir-a alitsü akok. Ano karbo mozü lar/yi lar kümer college/institution toktsür tezülen nemzüa alir-a alitsü akok. Tsürabur-bo timtema ita shia senotsü bener yoker; saka chirnurbo amajok nung mapang/senotsü endoka lia alitsü akok. Ano aiur chanu karbo 'Hotel' nung teküp yoka mapa tamajung inyaka alir-a karbo alitsü akok. Tawa Social Media nung anguba; Dimapur nung aiur chanu karbo Mobile Recharge asütsü sen teraka mechi nung tzümar auto driver dang teküp ayokba linuk tenzükéri apoba nguogo. Anungji tsürabur ajaki chirnur atema khuret kanga abentsüla. Rongsen aika benden-aka chirnur taküm raksadaktsüra rongsen ajakji anak-aoyi akümtsü. Anungji rongsen bushidang chirnur taküm meraksadaktsütsüla. Alima nung rongsen ajak dang tulutibaji chirnur tajung kümdaktsüba ya asütsü. Bank nung sen aika liaka; kimung-lumong aika liaka; ki tajung aika yangluaka; chirnur tamajung kümdaktsüra ajakji anak-aoyi akümtsü. Anungji tsürabur ajaki chirnur nem mapang peria agütsütsüla. Chirnurtem nubu junga maküm tashi tsürabur aküm nung alitsü; saka kodang chirnur nubu junga kümdir; tsürabur tain kümer külenbo chirnur aküm nung alitsü. Ajioda, tsürabur shirnoki chirnur mapang shitak nung azüoka jenjang tajung kümdaktsür; parnokji chirnur aküm nung jangradema alitsü. Anungji tsürabur ajaki chirnur timi azüoka intetdaktsütsü atema chirnur nem mapang peria agütsütsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Rev. Vinod Peacock-i WCRC General Secretary mapa agizük



February 01, 2026 nü Germany kübok Hannover yimti nung sentong ka nung Rev. Philip Vinod Peacock-i (abelen mezügbuba) World Communion of Reformed Churches General Secretary mapa agizükba sentong nung tangokba noksa nung angur.

February 04, 2026: February 1, 2026 nü Germany kübok Hannover yimti nung sentong ka nung Rev. Philip Vinod Peacock-i World Communion of Reformed Churches General Secretary mapa agizükogo.

World Communion of Reformed Churches nung India nungi tang mezüng pa tongti kümogo. Yaküm September ita nung Executive Committee senden ka nung vote agütsütepa General Secretary menden atema pa shima liasü.

Pai General Secretary mapa agizükba sentong nungji alima tesem balala nungi lenirtem dena liasü. Iba sentong nungji World Council of Churches nung tongti, Rev. Prof Dr Jerry Pillay-i jembia liasü.

Rev. Pillay-i, "Philip ya shisashir ka, tamangtir ka aser mapa agi inyaka sayur ka. Pa mapatem ajanga alima nung Reformed Churches

züngsemtem itdaksügogo," ta ashi.

Paisa, Rev. Peacock dak ketdangsuba sempet-a lir aser tanü putu nung timtem balala koktettsü atema pa dak sempet lir, ta ashi.

Asayamenü olen ka nung Rev. Pillay-i, Peacock-i India nung traffic nung gari kanga junga aniteter aser Germany nung gari ka danga mesenzüba tesem nunga pai traffic özüng shidak benshir, ta ashi.

Kasa sentong nung Lutheran World Federation nung lenir, Rev Dr Anne Burghardt-ia jembia liasü.

Rev. Philip Vinod Peacock-i iba organisation nung ochi temeden aser kulisüba wadang nung rangloker inyaka liasü. Rongseketzüng tsütsü ajak kasa züngshiba aser climate change dak sendakba International programmes-a pa leniba nung inyaka aruogo.

Pa lenisüba nungsa Focus Palestine kübok mapa balala

tashi inyaka liasü.

Pa India nung aliba Theological institution asem nungi degree angu. Pai Bachelor of Theology degree Union Biblical Seminary, Pune (1991-1994) nungi angu, Bachelor of Divinity degree Gurukul Lutheran Theological College (1995-1997) nungi angu aser Master of Theology degree Tamil Nadu Theological Seminary (1998-2000) nungi angu.

2000 küm nungi tenzüka pa Kolkata nung aliba Bishop's College nung tesayur inyaka liasü aser Associate Professor ka ama pai Dalit & Feminist theology nung rangloker inyak.

Rev. Peacock leniba nung taruba General Council senden amentsü atema asalentong yanglutsü.

World Communion of Reformed Churches ya linük 107 nung lir aser member denomination 230 nung züngsem million 100 dak tali lir.

ANOGO ABEN TSÜNGREM DEN

Kodang ajak samar ama bilemer

O ozü kümtetdakba Tsüngrem, Nü nüng sentsüwangshitsü asoshi onok yariang, nü nüng nung onok menen nungi kümzükan, aser ozü menentem dokang. T. Ken. 79:9.

Anogo kar nung asen meküta atalokbatem mapatem angudang ajak samar ama bilemer. Asaph-i iba ama bilema iba ken ya zülu. Pai meküta reprang aser memerüki angu. "O Tsüngrem limapur kintemi Nü senmangdaki aitogo..." (T.Ken. 79:1). Asaph-i Yirusalem raksaba indang jembia. Tanü-a asenoki asen meküta nisungtem temulongjang memerükba agi sünger angur. Idangji Asaph-i tasüba angu. "Anüng ozütem asoshi nü tenzüker temang chiyongtsü asütsü agütsüogo..." (T.Ken. 79:2,3). Alimaji tasü mang aremdak ka lir. Temenen taaji tasüba lir. Ajaklen asenoki aji angur. Asaph-i ano sensamasatsüba angu. "Onok kiyongertemi onok sempar, aser onok meküta alirtemi sensatsür" (T.Ken. 79:4). Aiben aseni takok mangur ama bilemer aser parnoki asenok sensamasatsür. Asaph-i tsükchirtemi raksatsüba angu. "Kechiaser parnoki Yokob meyokogo, aser pa talidak raksatsüogo." (T.Ken. 79:7)

Au, satan tekai teraksatsüba mapa inyaker. Saka Asaph-i Tsüngrem teyari asoshi ayimten "Onok yariang O Tsüngrem, Na ozü tekümtet." Kechiba "Ne nüng sentsüwangshitsü, Nü nüng asoshi onok kümzükan" (T.Ken. 79:9). Asaph-i Tsüngrem sentsüwangshi asoshi dang bilema temenen nangzük aser kümzüksü asoshi Tsüngrem dang sarasadem. Tsüngremi asenok Temenen pungiba nung yarir. Pa arutsü aser kümzüksü (T.Ken. 79:11,12). Yisu Khrista arua asenok kümzükbaji koda tesüngmangtsü asütsü !

Pei kidang sarasademtsü atema temelaba meshitsü menüngdak: UP court

February 04, 2026: Uttar Pradesh nung mapang shia Khristantem pei kidang adenshir sarasademba mapang nung Hindu nung telok balalai timtem agütsüba kanga bulua atalokba mapang ka nung state nung high court kati, Khristantemi pei kidang sarasademtsü atema sorkar dang nungi temelaba meshitsü menüngdak, ta metetdaksüogo.

January 27, 2026 nü Allahabad High Court-i iba obendangji agütsü aser February 2 nü yimjak nunga sangdonga liasü.

Allahabad High Court-i, pei nija kiojen nung adenshia sarasademtsü atema temelaba meshitsü menüngdak, ta metetdaksü.

January 27 nü iba obendang ya Justice ana- Atul Sreedharan aser Siddharth Nandan nati akümba bench-i metetdaksü.

Court-isa, iba obendang ya

India linük temzüng kübok agütsüba obendang lir, kechiyong iba temzüng kübok yimsü balala amanger shinga bendangshidang mesüi özüng kübok senso ajak nem kasa tekümüzkba agütsür, ta metetdaksü.

Court-isa, state ketdangsertemi iba tangatetba nungji inyaksüla, ta metetdaksü.

Khristan organisation ana-Maranatha Full Gospel Ministries aser Emmanuel Grace Charitable Trust nati court nem temepishiba ken o ka agütsü, aser court-i iba ken oji angadangba sülen item obendang agütsü.

Khristan organization anaprongla jagi, pei nija kiojen nung sarasademtsü atema onoki aiben temepishiba agütsü saka local ketdangsertemi magizüker, ta metetdakja liasü.

Uttar Pradesh nung Khristan lenirtemi court obendangji pelaa agizükogo.

Uttar Pradesh nung Pastor Joy Mathew-i, pei kidang sarasademba atema-a Khristantemi timtem ajangshia arur, ta metetdaksü.

Pastor Joy-isa, "Pei nija kidang sarasademtsü atema temelaba meshitsü özüng mali, ajisüaka mapang shia police-i timtem agütsür aser asüngdangyar," ta ashi.

Pastor Joy Mathew-isa, tesüiba küm ishika tsüngda police-i mita aoba aser Khristantem anema inyakba ajanga state nung house church 1,000 dak tali shibangogo, ta ashi.

Paisa, tang tesüsa court-i iba obendang agütsüba ajanga Khristantemi tarendak kecha makai tekülem agitettsü imlar, ta ashi.

Pai ashiba agi, Hindu nationalist telok balalai tashishiba ken o agütsüba nung ajemdaker police-i Khristantem anema inyaker aser tekülem agitsü atema jelia temelaba

meshitsüla, ta ashir. Khristantemi tangartem Khristan yimsü dangi meyipdaksür, ta tiyazü nung tai tongloka apur aser reshikangshir.

Tang High Court-i obendang agütsüba sülen Arogo nung lenirtemi court obendangji ajenzüker district police aser sorkar ketdangsertem nem lema agütsütsü tebilemba lir.

Court-isa, iba obendang ya nija kiojen atema dang lir, anungji gari lenmang mesüra moapu nung sarasademtsü/ tekülem agitsü atemabo tim ketdangsertem dang nungi jelia temelaba meshitsüla, ta metetdaksü.

Court obendang pelaa agizüka Arogo nung lenir kati, tang court-i agütsüba obendang ya tammang nung tesangwa tilaka mesük, ta ashi.

Paisa, tesüiba küm ishika tsüngda Uttar Pradesh nung anti-conversion özüng kübok Khristan 500 dak tali nem tai

tongloka puogo, ta metetdaksü. India nung nütsüng teimtiba aliba state, Uttar Pradesh nung 2024 küm anti-conversion özüng ano tesashiba yanglua agizük. Iba özüng tasenba kübok bail dak sendakba telatetba tesashiba aküm aser özüng alema yimsü meyipba/ meyipdaksüba nung aibelenertem tajemba agia küm 10 nung tenzüka taküm piyong tepuokdak ayutsü.

Iba özüng kübok tashiyim amshia, mesüzüka mesüra ashikülak ajanga tamangba yimsü meyipdaksüba khenyongi nokdang aser Khristan missionary tem mapa ajakji yimsü meyipdaksütsü atema mesüzükba ama züngshir. Iba özüng kübok aibelenba atema nisung mashie kati police mesüra ketdangsertem nem osang metetdaksütsü akok. Iba özüng kübok aibelenertem dang senchi 100,000 (lakh 1) tashi achitsü akok.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tzüla

(n) au aser süngküm ajanga tzü mesür aruba (bamboo water channel)

* Akhi mapangbo ayong nung tzüla nungi tzü mesepzüksa ajem.

Tzüla

(n) kiyi tapu ka (earthworm)

* Tzüla yagi alitemo yanglur, anungji metepsettsüla.

OLONG PAITEP # 7405

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

1. Nüji masü - (4)
3. Techniütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7404 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüing,
10. Omen, 11. Lemta, 13. Ola,
14. Kin.

NAI-A YA METETTER

India nunger Zakir Hussain Khan-i Islam Prophet Muhammad anisüngzüksa tesem Green Dome yangluba ajanga Guinness Book of World Records nung züluokogo.

Zakir-i yanglubaji alima nung "largest professional oil painting by a single artist" lir.

Iba special painting tasazük ya 333 m² (3,584 ft² 54 in²) lir aser ibaji tennis court ka den tuluba lir.

Taoba Raijor Dal tanishir Gyanashree Bora-i sorkar mapa toktsü

Guwahati, February 4, 2026

(Agencies): 2026 Assam Assembly elections nung tenük yoka Goalpara College nung Chemistry Assistant Professor aser taoba Raijor Dal tanishir Dr. Gyanashree Bora-i sorkar mapa toktsüogo.

Dr. Bora-i government service toktsüogo aser iba ajanga la academics nungi political arena-i meyipba sayur.

Taruba Assembly elections nung tokteptsü tangatetba nung sorkar mapa nungi anener ta Dr. Bora-i ashi.

Lai koba telok nung adentsü'ar mashii saka osang angazükba agi lai Raijor Dal-i tanaben meyipa aotsü akok.

Dr. Bora-i la koba constituency nungi tokteptsü'ar ano melemtet ta ashi saka lai Golaghat district kübok la

tasodak Khumtai mesüra Tinsukia district kübok Makum nungi tokteptsü akok ta lemsatep.

Lai sorkar mapa nungi anenba osang yimjak nung prokshiba sülen political party aikati la den osang metetpelaogo ta Bora-isa ashi.

"Ni regionalism kodanga metoktsütsü" ta Bora-isa nenshi.

Taoba mapang Gyanashree Bora ya Raijor Dal atema "Agni Kanya" ta züingshia liasü. Lai regional tebilemstütem atema noktakba ajanga iba tenüng jaloktsü.

Dr Bora-i 2023 nungi Goalpara College nung Department of Chemistry nung Assistant Professor ka ama inyaksü tenzüka liasü.

Dr Bora-i tesayur mapa meinyakdang Raijor Dal den sendaktepa liasü. Iba mapang lai party spokesperson aser women's wing president inyak.

Kuki-Zo nungeri 33 buba Remembrance Day amung

Imphal, February 4, 2026

(Agencies): BJP central leadership-i New Delhi nung Manipur MLA tem aser alliance partners den ajurutepa sendentem amenba mapang ka Manipur tenemlen nungi ola balaka yokogo.

Kuki-Zo nungeri February 3, 2026 nü 33 buba Remembrance Day ayonga amung. Parnoki Kangpokpi district kübok Phaijang nung aliba Martyrs' Cemetery nung sentong agi.

Iba sentong ya Committee

on Tribal Unity (CoTU) kübok ayongzüksa aser Kuki Inpi, Thadou Inpi, Kuki Women Union Sadar Hills, Kuki Students' Organisation (KSO) Sadar Hills nunger den tanga teloktem nungi lennirtem aser teshimtet nübotem aden.

Iba sentong nung adenertemi taküm bendanga agütsürtem aser Martyrs' Cemetery nung rema alir nem tetushi agütsü.

Parnoki tasürtem aser parnok kinungertem asoshi sarasademtsü aser o jembirtemi

Kuki-Zo nungeri küm aika bendanga agüja aruba tatalokbatem lemsatep.

Iba sentong nung CoTU-i Kuki-Zo nunger nem Union Territory with Legislature ama Separate Administration ka agütsütsü takhangba nenshia liasü.

Tanü anogo piyong Kangpokpi district ajungalen mokdang. Shishilembadak, shishaliok rejutem aser nija rejutem ajak shibang aser nübortemia pei sasa mulungteta maparen kecha meinyak.

Akasa Air-i Dibrugarh nungi tayimtsü tenzükögo

Dibrugarh, February 4, 2026

(Agencies): Akasa Air-i February 3, 2026 nungi Dibrugarh nung mezüngbuba tayimtsü tenzükögo aser iba ajanga Upper Assam, North Bengal aser South India tsüngda tesentaktep tashi itdaksür.

Dibrugarh Airport nung sentong ka agiba sülen Bagdogra-Dibrugarh-Bagdogra sector nung inaugural service tenzüksa. Iba sentong nung Airports Authority of India aser

Akasa Air ketdangsürtem aden.

Akasa Air-i Bengaluru-Bagdogra-Dibrugarh-Bagdogra-Bengaluru route nung tayimtsü senzüdaksütsü. Iba service ya hopta nung asemben alitsü (Tuesday, Thursday & Saturday) aser

Bagdogra nung khi anenzüka Upper Assam aser Bengaluru tashi tayimtsü senzütsü.

Bengaluru nungi Bagdogra adena anepdang 10:25 ako nung Dibrugarh atongtsü. Iba sülen

anepdang 11:00 nung Dibrugarh nungi Bagdogra adena Bengaluru-i apusoa aotsü ta Akasa Air-i metetdaksü.

Iba lenmang tasen ajanga Assam, North Bengal aser southern India tsüngda senzürtem ajangzüksa ta Airport ketdangsürtemi ashi.

Dibrugarh Airport administration-i Akasa Air aruba pelashishia agizük aser iba tesentaktep ajanga regional connectivity ulushitsü teimla lir ta metetdaksüogo.

Venezuela nung nüburtemi tir aser kinungtsü chioktsü khanga longkak ait

Caracas, Tsüklai/February 4 (Agencies): Tir Nicolas Maduro aser pa kinungtsü Cilia Flores chioktsü khanga nisung meyirejang aikati Venezuela yimtiba Caracas nung longkak aita liasü. US nunger sepaitemi tir aser kinungtsü pur aoba sülen ita ka lir tang nüburtemi longkak aitar.

"Venezuela-i Nicolas nüngdaker," ta Mongolbarnü longkak aiba mapang nüburtemi ayima liasü.

Nisung meyirejang aikati tir pusema ojang zülü amer longkak aiba nung shilem agi aser aikati tena US nung tepuokdak nungi chioktsü akhangba tayongzükba osangtem tola nung zülua semer shilem agia liasü.

"Empirei parnok pur ao. Onoki parnok meyipa aginer," ta banner ka nung zülur liasü.

Taoba tir Maduro'er jabaso aser Venezuela indang National Assembly züngsem Nicolas Maduro Guerra-i sentepa aliba lokti den o jembiba mapang, US military-i tebu January 3 nü pur aoba ya parnok tejak nung taraka ama teti nüloka alitsü, ta ashi.

Sorkari ayongzükba sentong nung public sector nung inyakterema aikati shilem agi. Local media outlet Venezuela News-i ashiba agi, tir aser kinungtsü na chioktsü asoshi akhangtsü atema "global day of action" nung shilem ka ama iba longkak aitba sentong ya ayongzüka agiogo.

"Onok kanga mangmanger, jashir aser mit adoker," ta arishi küm 58 tain municipal employee Jose Perdomo-i ashi, shiba Caracas nung longkak aitba nung shilem agia liasü.

"Künübosa parnoki onok tir

chioktsüsa akümtsü," ta pai ashiba den, pai Venezuela indang interim lenir, Delcy Rodriguez-a pusemer ta shisem.

Acting tir mapang agizükba sülen Rodriguez inyaksangshi kanga mesademi arudar. Delcy sorkar kübok Maduro pusemertem peladaktsütsü merangba mapang US tir Donald Trump-i Caracas nem takhangba agütsüba dena ataloktsütsü merangba agi kanga timtemdar.

Trump-i ashiba agi, pai takhangba agütsüba Caracas-i ataloktsüra pai Rodriguez den inyaksü mulunga lir.

Washington takhangba atalokja Rodriguez-i yimden yimsüsüba tsütsü tepuoker aika chiokkogo aser Venezuela indang nationalised hydrocarbons sector ya private investment atema lapoktsüogo.

Muammar Gaddafi'er jabaso Saif al-Islam Gaddafi khasetogo

Zintan, Tsüklai/February 04 (Agencies): Libya indang taoba lenir Col Muammar Gaddafi'er jabaso Saif al-Islam Gaddafi khasetogo ta osang ajanga ashir.

Mapang ka tebu melena yimsü asütsü ama repranga alisang arishi küm 53 tain Gaddafi asüba ya par political team tekolakbai Mongulbarnü jangjatsüogo, ta Libyan News Agency ajanga ashir.

Nisung pezü commando unit kati Zintan yimti nung par kidang pa tepset ta pa okatsüri ashi, saka shirnoki iba mapa inyakar mejangja.

Ajisüaka teyi-ibo Libyan TV dang pa ya Algeria den linük arütsü anasa asü ta ashi.

Saif al-Islam Gaddafi tebu 1969 nungi 2011 tashi Libya yimsü süa arur tepsetba sülen par jabaso ya linük nung sentsü aketer aser tetsübotiba nnisung

ka ama lia aru.

Libya-i 2000 nungi Gaddafi yimli laoba mapang tashi West den tesendaktep yanglushiba mapang 1972 küm asosang Saif al-Islam Gaddafi yagi tongti shilem agia aru.

Pa tebu atsüngdokba sülen sorkar anema longkak aiter dak tashiyim amshiba nung tongti shilem agi ta tai tonglokja alisang ya parnok anemer militia-i Zintan yimti nung küm trok jungnüa tepuokdak ayu.

International Criminal Court-ia 2011 küm opposition longkak aitba ajemrepba nung shilem agi ta tai tonglokja nisung meimchir anema mapa tamajung inyakba asoshi ken o jembitsü bushia liasü.

2015 küm Tripoli nung aliba court kati iba ken o nung pa meliaka tasüba temerenshi agütsütsü obendang agüja liasü. Tripoli ya linük anüolen lir, kong

UN-i yariba sorkari yimsü asür.

Ajisüaka küm ana lir anüdoklen Tobruk nung militia-i pa chioka liasü.

Gaddafi atsüngdokba sülen Libya ya militias telok balala kübok lemsar liasü aser tang sorkar ana kübok sadanger lir.

Tebu yimsüsüba mapang sorkar nung pa shilem tejangja meliaka pai policy yanglushitsü aser tematiba jenjang nung ken o jembia aru aser itemji ajanga tebu nuclear noknü sentongtem yutsü. Iba ama tezüngzüktep mechi north African linük nem tenokdangba agüja aliba tem agien aser linük kari Gaddafi ya reformist ama züngshia liasü.

Gaddafi-i tebu nungi yimsüsüba senmang aginüa mali ta teti jembia aru.

Ajisüaka 2021 küm pai tir election nung tokteptsü sangdong, koba mapang telatet makai thinen.

Israel-i Gaza nung nisung 18 tepset

Cairo, Tsüklai/February 4 (Agencies): Bodhbarnü Israel-i tank amshia Gaza kübok tesem balala amakba sülen tanur pezü densema Palestine nunger 20 tepsetogo, ta health ketdangsürtemi metetdaksü.

Asürtem rongnung medic-a ka densema liasü, shiba Khan Younis yimti nung yirur alirtem yari aoba sülen tepseta liasü, ta health ketdangsürtemisa metetdaksü.

Kasa mapang nung Gaza yimti north len tesem ka amakba mapang ita pongu tanur ka tepsetogo, ta health ketdangsürtemi metetdaksü.

Egypt den arrtsü nung Gaza atema tongtibangtiba crossing lapoktsüba sülen anogo asem lir Israel-i Gaza kübok tesem balala makogo, aser iba ajanga US teyongtsüi ia ceasefire benoker aliba nung tetsükdaktsü bulu adokdaktsür.

Hamas den armistice line anasa inyaksangshia aliba

Israel nunger sepaitem dak telungpurtemi injang khaloktsüba sülen tesem balala maka liasü, ta Israel military-i ashi.

Parnokisa, telungpurtemi parnok amakba mapang Israel nunger sepai ka kanga mejungi yiruogo, ta ashiba den iba ya ceasefire atema nangzüktepba anema lir ta shisem.

Kasa mapang nung Rafah arrtsü crossing ajanga aotsü aliba Palestine nunger shirangertem shirnok iba arrtsü adena aotsü renema liasü, parnok dang Israel-i parnok arrtsü adena aotsü asoshi thinentzüba metetdaksü. Iba sülen ghonda ishika lir shirangertem dang arrtsü adena aotsü asoshi renemtsü shia liasü.

Israeli agency COGAT, shirnoki Gaza-i aitsü aser tugutsü atema inyakyim azüoker, parnoki ashiba agi, Rafah crossing lapoka dang lir, saka parnoki nüburtem arrtsü

adena yoktsü atema World Health Organization nungi tenüngdakba osang magizük ta ashi.

Ceasefire benokba sülen Israel nunger sepaitemi nisung 530 tepsetogo aser asürtem ya timba civilian liasü ta Gaza health ketdangsürtemi ashi.

P a l e s t i n e n u n g e r telungpurtemia kasa mapang nung Israel nunger sepai pezü tepsetogo, ta Israel nunger ketdangsürtemi metetdaksü.

Gaza Strip nung rara m a p a n g Palestine nunger 71,000 dak tema tepsetogo, ta Gaza nung health ketdangsür- t e m i s a metetdaksü.

Russia-Ukraine yimjung ken o Abu Dhabi nung jembir

Abu Dhabi, Tsüklai/February 04 (Agencies): Ukraine aser Russia yimjung ken o jembirtem United States tetsüngtai ia tanaben buba jembishinü United Arab Emirates (UAE) nung tenzükogo aser parnoki Russia-i küm pezü jungnüa Ukraine den raraba tembangtsü asoshi lenmang bushitsü.

Russian aser Ukrainian delegations ya Bodhbarnep Abu Dhabi tonga aru, ta Russian state media aser Ukrainian chief negotiator indang okatsür kati ashi. US delegation ya kodang arujar mejangja.

"Abu Dhabi nung ano jembishinü ka tenzükogo. Kyiv team-i teti asoshi yimjung aginer," ta Ukrainian delegation tekolakba Rustem Umerov-i social media nung ashi.

US Tir Donald Trump tetsüngtai ia energy facilities nung amakba anentsü atema züngzüktepba nung Russia-i aibelener ta Ukraine Tir Volodymyr Zelenskyy-i tai tongloksüba mapang Abu Dhabi nung linük asem ya jembishinür.

Yimjung ken o jembitsü lia Russia indang drone aser missile aika yoka Ukraine indang energy grid maka power aser talem agütsüba raksatsü, anungji UAE yimtiba nung jembishinüba nung terenlok alitsü teimla ajemdaktsür.

"Russia-i iba ama amak shia Moscow yimya melenogo ta sayur. Parnoki maneni

raratsü aser Ukraine raksatsütsü meranger, aser parnoki yimjung inyakyim süoki ia magir," ta Zelenskyy-i Mongulbarnü shia liasü.

Taoba ita UAE nungsa mezüngbuba senden mena liasü, koba Moscow aser Kyiv tsüngta yimjak ung ajurutepa jembishinü akaba mezüngbuba alitsü, aser iba ya rara tembangtsü asoshi Trump administration-i benokba sentong ka lir.

Taoba küm Trump administration-i linük ana dang atsüanem akatsü ajungshia aru, saka tongtipang onüktem nung tangatettep kati maruteter.

Tongtipang onükji Ukraine anüdoklen tesemtem indang tia ya lir, koba shilem tuluka Russia-i amokbanga lir. Tarutsü nung Russia-i amakba mapang Ukraine asoshi security guarantees agütsütsü onük ya tetsükdaktsü ka lir.

Kyiv-i Donbas nungi sepaitem ainshitsüla ta Moscow-i akhanger, aser yangji ali rongsen jenti aliba tesemtem dena lir. Parnokisa Ukraine anüdoklen rakzüka aliba ali tem nung international recognition aginer.

Kyiv-i tang aliba front lines nung rara anentsüla ta ashir aser sepai külen tsütsü kisüng ainshitsüba magizüker.

Ukraine delegation ya National Security and Defence Council tekolakba Umerov-i anir lir aser külen Russia nunger ya military intelligence director Igor Kostyukov-i anir lir.

SANGDONGER

Mr. Bendangmongba Walling küm 35 tain Mr. Tekasashi Walling Süngratsü dang tebu yima lia aru, aji saka Bendangmongba Walling-i tashi mangai libaliro nung meshidaki lia aru nungji tanü 31st January, 2026 anogo nungi ni Mr. Takasashi Walling aser tetsü Mrs. Tatongmenla Aier nati Mr. Bendangmongbaji ozü jabaso masü ta sangdonger.

Tanü nungi Bendangmongba-i kechi khuretsa bener arutsüdir aji joko onok khuret masütsü.

Kulisür/Tezülor

I. Moa Aier

Tekasashi Walling

Nungshimongba Jamir

Dated: 31.01.2026

Süngratsü Yim



ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110 029
EXAMINATION SECTION
Advertisement No. 377/2025



ICMR Headquarters aser iba indang Institutes/Centres nung Scientist-B (Non-Medical) atema recruitment examination

ICMR Headquarters aser iba indang Institutes/Centres nung Group-B (Non-Medical) posts balala nung shimtsü asoshi Indian senso nungi online application meshir. Posts indang tejangja & eligibility ya AIIMS website i.e. www.aiimsexams.ac.in nung aliba advertisement nung angutsü. Examination ya online (CBT) yimya nung alitsü aser iba sülen shimba candidates tem interview alitsü.

Online Registration for applications	
Opens on	Closes on
02 nd February, 2026 (Monday)	01 st March, 2026 at 5:00 pm (Sunday)
Date of Recruitment Examination	
Date of Exam	Examination Centre in the State
Tentative in the month of April, 2026	Delhi/NCR Only

Tongtipang: Applicants ajungai mapang shia AIIMS website i.e. www.aiimsexams.ac.in semdangtsü mepishir, kechiaser iba sülen temelenshi/metongshiba/updates ajak website kisüng nung inoktsütsü.

Sd/-

ASSISTANT CONTROLLER (EXAMS.)

CBC : 17112/12/0069/2526

AMAM-i ayongba 9th Auto & MotoX Feb 5-7 tashi akatsü

Mokokchung, Tsüklai/February 4 (TYO): Adventure and Motorsports Association Mokokchung (AMAM)-pur 9th Auto & MotoX 2026 sentong Feb 5th nungi 7th anogo asemnü yangi Imkongmeren Sports Complex, Mokokchung nung ayongzüka lir, AMAM sangdong ka ajanga metetdaksüogo.

Taküm tetoktepba telemsatemji Autocross nung - Open, below 1300CC aser SUV ta alitsü. MotoX nung - Beginner aser Open category ta alitsü. Item tetoktepba balala nung takoker nem senpet trophy/certificate den sen senpettsütsü. Sen ajak meyokteper (total prize pool-

ji) INR 3.50 lakhs lir. Jangratemtsü kaji; iba sentong nung Northeast Championship round ta sür ka alitsü aser iba nungji Nagaland aser North-east state balala nungi club balala balala meyonga motorsports nung mongin aikadi shilem agitsü imladar.

Feb 5 nü shilem agitsüpurtem reprangshimba maparen (technical inspection) alitsü. Feb 6 anepdang District Transport Officer, Mon, Imkümwapang-i AutoX tenzütsütsü aser Feb 6 nikongdang Managing Director, LL Group Nagaland, Longden Longkumer-i MotoX lapoktsütsü sentong renema lir. Feb 7 nü tesüsabuba

tetoktepbatem den senpet agütsüba sentong agitsü aser iba sentong nung MLA & Advisor, Social Welfare, Wangpang Konyak tetushi tesemdang asütsü jaoka lir.

Taküm iba 9th Auto & MotoX sentong ya Nagaland Minerals & Mines, PitStop (Kohima), MG Dimapur, Ahibi aser Digi Printer parnoki senotsü teyari agüja ayonger.

Iba sentong nung tejangrartem ajak pelashishia arua reprangtsü asoshi tayongertemisa ayongzüka metetdaksü. Iba tetoktepba dak sentakba nung osang tejangja metetpelañürtemi iba mobile phone number (+91 9366352372) ajanga AMAM ketdangsürtem tongtettsü.

Asian C'ships: Rana-i 10m air pistol asaya nung bronze angu



Tsüklai/February 4, 2026 (Agencies): Bodhbarnü Asian Championship nung tebur 10m air pistol asaya nung World champion Samrat Rana-i tetenzüklenbo kanga junga asaya-a tenzüka saka tatem nung bronze medal dang nguteta liasü.

Samrat, shibai taoba küm Cairo nung World Championships nung kanga junga asaya-a gold medal ngua liasü, pai taküm mezüngbuba asayamung nunga takok tajung angutsü imla liasü. Pai asaya kanga junga tenzük aser qualification round nung point 581 ngua pa tanabuba jenjang nung final-i ai.

Ajisüaka medal round nung arishi küm 21 tain asayar yagi point 220.3 dang angu aser Uzbekistan nung asayar Vladimir Svechnikov (242.0) aser Kazakhstan nung Valeriy Rakhimzhan (241.0) na sülen tasembuba jenjang nung tembanga liasü.

India nunger asayarsa Sharvan Kumar, shiba final-i ai pa pezübuba nung asaya tembang.

Kasa asaya nung India team-i silver medal ka nguogo. Samrat (581), Sharvan (578), aser World Championships bronze medallist Varun Tomar (573) nunger senteper point 1,732 ngua liasü.

Team asaya nung Uzbekistan-i gold medal angu. Parnokia point 1,732 dang angu saka parnoki 'inner 10' score 58 angu koba India-i 52 dang ngua liasü. Team asaya nungsa Kazakhstan-i point 1,731 ngua parnok tasembuba jenjang nung liasü.

Iba asayamung atema India-i asayar timtiba yokogo. India-i asayar 118 yok aser tanabuba nung Kazakhstan-ia asayar 35 yokogo. South Korea aser Japan team-a kanga tashi tait aser Chinese Taipei, Vietnam, aser Hong Kong nungi asayartemia junga asayatsü imlar.

FanCode nem ISL broadcast temeden agütsüogo



Tsüklai/February 4, 2026 (Agencies): Indian Super League (ISL) 2025-26 season broadcast rights FanCode nem agütsüogo, aser Kaleidoscope Production and Services (KPS Studios) nem world feed atema production rights agütsüogo.

All India Football Federation (AIFF)-i Request for Proposal (RFP) tender January 18 nü sangdongba sülen bid ya Hombarnü lapokja liasü.

FanCode-i Packages A, B

as D atema tejangraba aliba sayu, koba feed production, linear TV aser digital streaming dak sendaka lir. Ajisüaka parnok nem league asaya 91 atema linear TV aser digital broadcasts temden dang agütsü.

Kasa mapang nung Kolkata nung amendaker aliba KPS Studios LLP nem world feed atema production rights agütsüogo. Parnoki taoba mapang I-League, Durand Cup aser Bengal Super League

asayatem production achayanga liasü.

FanCode, UK-based Two Circles, Anandabazar Patrika (ABP), JioStar, Monarch with PR Solutions, Sportzworks aser Kaleidoscope (KPS Studios) nungeri ISL broadcasting aser production atema tejangraba aliba lemsatapa liasü.

ISL broadcast package tem atema bid tem:

- * FanCode (Package A, B, D)
- * JioStar (Package D)
- * Sportzworkz (Package E)
- * KPS Studios (Package E)ABP Network (Package D, E)
- * Monarch with PR Solutions (Package D, E): Disqualified
- * Two Circles (Package C, D, E): Disqualified

ISL media rights packages:

- * Package A - World Feed production + linear TV broadcast + digital streaming
- * Package B - Linear TV broadcast + digital broadcast
- * Package C - Linear TV broadcast only
- * Package D - Digital broadcast only
- * Package E - World Feed production only.

India tetsür team-i Badminton Asia team C'ships takok nung tenzükogo

Tsüklai/February 4, 2026 (Agencies): Defending champions, India tetsür team-i Bodhbarnü Badminton Asia Team Championships nung mezüngbuba asaya nung Myanmar 5-0 agi koka iba asayamung takok nung tenzükogo.

Group Y asaya nung Tanvi Sharma-i mezüngbuba kija asaya nung Thet Htar Thuzar 21-13, 21-16 agi akok aser iba sülen Rakshitha Sree Santhosh Ramraj-i 21-12, 21-6 agi Eaint Chit Phoo madak takok ngua India team 2-0 agi tejakdang aküm.

Tasembuba kija asaya nung Malvika Bansod-i 21-19, 21-12 agi Lin Lin Htet koka iba asaya kokatok.

India tetsür team-i tarep asaya-a anaprongla koka liasü. Priya Konjengbam aser Shruti Mishra nati Su Latt aser Thet

Htar Thuzar na 21-15, 21-16 agi akok aser Treasa Jolly o Gayatri Gopichand nati 21-8, 21-6 agi Htet aser Phoo na koka liasü.

India team-i Badminton Asia Team Championships ya 2024 küm kokogo. Iba küm parnoki final nung Korea tsükdakja liasü.

Team-i PV Sindhu melenas asayar shinga meshim aser lanur asayar Unnati Hooda, Malvika Bansod aser Tanvi Sharma nunger dak dang metaloker asayadar.

Tanisha Crasto, Treasa Jolly, Priya Konjengbam, Shruti Mishra, Gayatri Gopichand aser Tanvi Sharma nunger ta asayar trok 2024 küm iba asayamung nung gold medal anguba team nung densema liasü.

India team Brehostibarnü Group Y nung Thailand den asayatsü.



February 4 nü Qingdao nung Badminton Asia Team Champions 2026 nung Group W nung China aser Malaysia na asayaba China tsür Jai Yufan(L) aser Zhang Shuxian nati akokba sülen tangokba noksa nung angur. Tenati tetsür tarep asaya nung Ong Xin Yee aser Carmen Ting na koka liasü.

BILEMDANGANG

"Tagütsünü mulungsentsü dena alir teti temulung süa dang alir."